



Oktobarip 30-at 2008

Inatsisartut suleriaasianni § 36 Imm.1 naapertorlugu Naalakkersuisunut apeqquq imaattoq matumuuna saqqummiuppara.

**Naalakkersuisunut apeqquq: Peqqinnissaqarfimmi sulinerup nalinginnaasup allanngorartineqannginniassaa anguniarlugu Peqqinnissamut Naalakkersuisoq qanoq iliuseqalersaarpa.**  
(Jonathan Motzfeldt, Siumut)

### **Tungavilersuut**

Ulluni kingullerni tusagassiuutisigut saqqummiunneqarpoq SANA-mi sulisunut taartaasartunut aningaasaleeqqittoqanngippat SANA-mi sulisut toqqissisimajunnaartut, aningaasallu 19 millioner koruunit angullugit immikkut aningaasaleeqqittoqanngippat ajornartorsiulivissallutik – allaat SANA-p matuneqarsinnaanera tusagassiortunit oqaatigineqareerluni. Upernaaq 17 millioner koruuninik SANA-mi taartaasartunut atuivallaarsimaneq pissutigalugu aningaasaleeqqittoqareerpoq.

Taamaammat Inatsisartuni ilaasortaalluni paaserusunnarsivoq aningaasarpasuit aningaasaleeqqissutaasut ilumut atorfissaminnut atorneqartarnersut – atuinerlu pappiaranngorlugu takussutissartalerlugu takorusunnarsilluni.

Kinaluunniit ajutoornermik nalaataqartoq nakorsanit ingerlaannartumik nakorsarneqarnissaminut periarfissaqartuarnissaa politikeritut – inuiattullumi pingaartitaraarput. Aningaasalli atugassaataasut killeqarmata eqqortumik atuneq aamma pinngitsoorneqarsinnaanngilaq.